

詩

毛

氏

傳

疏

詩毛氏傳疏卷二十

長洲陳奐學

谷風之什詁訓傳第二十

毛詩小雅

谷風之什十篇五十四章三百五十六句

谷風三章章六句

谷風刺幽王也天下俗薄朋友道絕焉

習習谷風維風及雨傳興也風雨相感朋友相須將恐

將懼維予與女將安將樂女轉棄予傳言朋友趨利窮

達相棄疏習習和舒之兒東風謂之谷風傳見邶谷風

須傳合下二章而總釋其義也○將猶方也文選任昉  
策秀才文注引韓詩將恐將懼薛君章句將辭也又楊

雄甘泉賦注引章句同傳云言朋友趨利窮達相棄者將恐將懼窮也將安將樂達也女既達而子終窮乃相遺棄以釋經中棄字之義趨利者所以推明棄之之故也序云天下俗薄朋友道絕絕猶棄也

習習谷風維風及積傳積風之焚輪者也風薄相扶而

上喻朋友相須而成將恐將懼實于于懷將安將樂棄

予如遺疏傳文疑有譌爾雅釋天焚輪謂之積扶搖謂之焱李注云焚輪暴風從上下降謂之積扶

下也扶搖暴風從下上升故曰焱焱上也孫注云迴風從上下曰積迴風從下上曰焱積與焱不同自不得紐

合為說傳云積風之焚輪者也正用爾雅焚輪為積之訓小箋云焚輪猶紛綸也案言此者以興朋友相切直

義已明備不煩更取扶搖以足經文積字之義而與雅訓並戾且上章維風冢上谷風維風及雨言谷風與雨

興朋友相須此章維風亦冢上谷風維風及雨言谷風與積興朋友相須若於焚輪之外更增扶搖之說則以

風之上下及風之下上為喻而於經中及字有難通矣朋友相須傳已見上章則此章更不必重文疊義也反

朋友相須傳已見上章則此章更不必重文疊義也反

復經傳義訓風薄相扶而上喻朋友相須而成十三字  
當是箋語誤入傳文耳風薄相扶而上鄭用爾雅扶搖  
爲疾之訓蓋以經之積爲迴也故不從爾雅毛傳其月  
令注迴風爲疾亦不從爾雅毛傳用意正同上章箋云  
喻朋友同志則恩愛成未章箋云以喻朋友離以恩相  
蓄亦安能不時有小訟乎唯此章無箋其云喻朋友相  
須而成三喻字一例讀可據以刪正

習習谷風維山崔嵬無草不芴無木不萎傳崔嵬山巔

也雖盛夏萬物茂壯草木無有不芴葉萎枝者忘我大

德思我小怨疏

崔嵬山巔巔俗顛字十月之交傳云山頂曰冢卒者崔嵬爾雅顛頂也山顛卽

山頂崔嵬者是山顛巔巔之狀兩傳義同谷風生養萬  
物山顛之草木宜茂盛以興大德也萎與矮通草木無  
萎以興小怨也後箋云據正義引定本及集注草木無  
有不芴葉萎枝者則正義本不同可知今觀正義云雖  
至盛夏之月萬物茂壯無能使草不芴者無能使木  
不有萎者可見傳文無有不芴葉萎枝者當作無不有

外葉菱枝者無不有卽偶然有之之意非謂草木盡外也中論脩本篇詩曰習習谷風維山崔魏何木不外何草不菱言盛陽布德之月草木猶有枯落而與時謬者況人事之應報乎此雖不爲朋友德怨之喻然其言草木猶有枯落正與傳義同也

### 蓼莪六章四章章四句二章章八句

蓼莪刺幽王也民人勞苦孝子不得終養爾

蓼蓼者莪匪莪伊蒿傳興也蓼蓼長大貌哀哀父母生

我劬勞

疏蓼蕭傳蓼長大兒重言之則曰蓼蓼爾雅莪蘿蒿者莪傳莪蘿蒿也蓋蒿類眾多蒿之言藁也若藁蒿蕭蒿每以秋老得名因之嫩而可食者

亦通稱蒿故傳於蕭蒿者莪本爾雅莪蘿之訓又申之云蒿者義取成材言各有當也此詩首章莪蒿木一物而以時之先後異其名下章莪藇本同類而以子之有無異其名後箋云嚴粲詩緝據爾雅藇之醜秋爲蒿及彼注疏藇蕭莪藇之類始生氣味各異其名不同至秋

老成則皆蒿之語以為我始生香美可會至秋高大則  
麤惡不可會喻子初生猶是美材至於長大乃是無用  
之子此語於取喻甚合且與首句夢夢長長大下文生我  
劬勞語意尤融貫與謂傳云長大指我長不謂長大成蒿  
夢夢者我言我長大夢夢然以喻子得長大者皆父母  
生我之德也匪我伊蒿於匪我下作一轉語言非我乃  
是蒿蒿不可會以喻子不得終養之故由於王事征役故以餅  
同三章因孝子不得終養之故由於王事征役故以餅  
馨疊取為喻末二章南山飄風以自敘其勞苦之情○  
爾雅哀哀懷報德也郭注云悲苦征役思所生也豈風  
母氏劬勞傳云劬勞  
病苦也與此劬勞同

**蓼蓼者莪匪莪伊蔚****傳**蔚杜藹也哀哀父母生我勞瘁

**疏**蔚杜藹釋草文郭注云無子者藹即蒿杜藹謂之蔚  
說文云蔚杜蒿也正義引義疏云杜蒿也三月始生  
七月華華似胡麻華而紫赤八月為角角似小豆角銳  
而長一名馬蒿新蒿案本草角蒿馬先蒿亦名馬蒿新蒿皆  
有子之蒿陸合杜蒿為一與郭景純說無子者不同且  
蒿以杜名郭說是也後箋云我為有子蔚為無子草木

自以有子者為材匪莪

伊蔚正與上句一例

餅之罄矣維疊之恥傳餅小而疊大罄盡也鮮民之生

不如死之久矣傳鮮寡也無父何怙無母何恃出則銜

恤入則靡至疏說文缶部云餅饔也或作瓶饔汲餅也

空也詩曰瓶之窒矣毛作罄三家作室也爾雅疊器也

小疊謂之坎周禮鬯人注大疊瓦疊疊有大小之異疊

大對餅小而言之也昭二十四年左傳鄭子大叔對范

獻子曰今王室實蠹蠹焉吾小國懼矣然大國之憂也

吾齊何知焉吾子其早圖之詩曰餅之罄矣惟疊之恥

王室之不寧晉之恥也此引詩餅喻已小國疊喻晉大  
國雖是斷章亦取餅小疊大之義傳云餅小而疊大正  
本左氏說也餅小而盡以喻已不得養父母疊大而恥  
以喻其不能養之故實由於上之人征役不息為可  
恥也所以刺幽王也後漢書陳忠傳建光中上疏云夫  
父母於子同氣異息一體而分三年乃免於懷抱先聖  
緣人情而著其節制服二十五月是以春秋臣有大惑

君三年不呼其門閔子雖要經服事以赴公難退而致  
位以究私恩故稱君使人作詩自傷曰瓶之罄矣周室陵遲  
禮制不序蓼莪之子道者亦上之恥也案忠釋詩凡三事  
言已不得終竟於經傳之惜悉合大東傳云空盡也罄  
此及鼓鐘民勞於釋詁文鮮者眇之假借故與寡同訓  
空聲之轉○鮮寡可以飽鮮為少與此鮮為寡者訓近而  
傳於茗之華○鮮寡可以飽鮮為少與此鮮為寡者訓近而  
意殊寡當讀惠鮮寡之寡鴻雁傳偏慇曰寡者因之慇  
父母者亦曰寡意揆下文無父無母而為之釋也寡字  
逗不與民連讀寡孤一也寡民之生與左傳寡我襄公  
文義相同案此下二句即承上二句一氣直下上之人  
征役不息則下之人勞苦不休以致養父養母不得終  
其養親之志孤寡之由皆上使之然也大戴禮用兵篇  
詩云鮮民之生矣不如外之使久矣盧注以爲困於兵革  
之詩此引以證用兵之害就上文久矣盧注一遺說不如外  
句乃孝子自歎其孤寡難堪也末二章云民莫不穀我  
獨何害穀生也言民無不生我獨懼此勞苦之害也民  
莫不穀我獨生也言民無不生我獨懼此勞苦之害也民  
父母也皆從此義而申說之讀文及華嚴經音義入  
傳怙特也渾言之則怙亦特也釋文及華嚴經音義入



法界品引韓詩云估賴也特負也析言之也恒憂也憂  
 不得養也入則靡至言役能而歸時父母皆喪入則無  
 所至士蓉禮下篇反哭賓弔者升自西階曰如之何鄭  
 注云反而亡焉失之矣於是為甚故弔之即此意也序  
 箋云二親病亡之時時在役所

父兮生我母兮鞠我拊我育我長我育我願我復我出

入腹我傳鞠養腹厚也欲報之德昊天罔極疏爾雅鞠

雅訓則母兮鞠我與父兮生我同義也傳以父生母養

分言下文畜我育我行其野傳畜養也思文箋育養

也鞠畜育聲義皆同拊與撫通拊我長我謂撫養長養

也願有回顧旋視之義復反也願復猶出入也腹厚釋

詁文詩連用九我字傳鞠訓養則拊畜長育皆養也腹

訓厚則願復皆厚也重言之者以明生我劬勞之意○

眠園有桃傳皆以罔極為無中王引之詩述聞云欲報

之德昊天罔極言我方欲報是德而昊天罔極降此鞠

凶使我不得終養也不言父母既沒不得終養者無父

何怙無母何恃已見於上文也昊天罔極猶言昊天不

備昊天不惠朱子所謂無所歸咎而歸之天也漢司隸校尉魯峻碑悲蓼莪之不報痛昊天之神嘉得詩人之意矣義即義字案王說固極是也昊天當席幽王節南山兩言昊天亦席幽王與此同非謂歸咎於天作此泛義易林乾蒙謙恆云南山昊天刺政閔身疾悲無辜背憎為仇蓋出三家詩與毛詩亦合

南山烈烈飄風發發傳烈烈然至難也發發疾貌民莫

不穀我獨何害疏蜀道難之難以烈烈為險阻之狀說

文嶠魏高也讀若厲玉篇廣韻作嶠云魏也集韻類篇嶠力藥切山高兒古有嶠山氏禮記祭法注厲山氏炎帝也起于厲山或曰有烈山氏然則烈烈為山之高峻故傳以為至難釋文飄本又作票何人斯傳云飄風暴起之風暴亦疾也飄風為疾則發發為疾兒

南山律律飄風弗弗傳律律猶烈烈也弗弗猶發發也

民莫不穀我獨不卒疏後箋云南山律律王介甫以為山之岑嶽說文無律字玉篇有

律字云律硯危石文選七發上擊下律注云律當為律是律律同字故傳云律律猶烈烈也案司馬相如子虛賦隆崇畢萃畢與律同古弗發聲同碩人發發皇矣弗弗竝訓為盛盛謂之發發亦謂之弗弗疾謂之發發亦弗弗猶發發也

### 大東七章章八句

大東刺亂也東國困於役而傷於財譚大夫作是詩以

告病焉

疏幽王之世東國傷困則而周之政亂也譚國大夫作詩告病本刺周亂編諸小雅

有饒簋飴有捄棘七傳興也饒滿簋貌飴執會謂黍稷

也捄長貌七所以載鼎實棘赤心也周道如砥其直如

矢君子所履小人所視傳如砥貢賦平均也如矢賞罰

不偏也睠言顧之漕焉出涕傳睠反顧也漕涕下貌疏

興者陳古以言今亦興體也餘皆託物以爲喻方言  
豐也自關而面秦晉之閒凡大貌謂之朦矂與朦通說  
文矂盛器滿兒引詩作矂後漢書張衡傳作蒙蒙者矂  
之假俗字伐檀傳執會曰矂案執會所咳甚廣傳既釋  
矂爲執會而又蒙矂盛黍稷謂執會爲黍稷也禮記  
記篇杞以桑長三尺或曰五尺故傳釋採爲長兒也鄭  
注裸記云杞所以載牲體者牲體卽鼎實牛羊豕鼎魚  
膳鼎皆七七取鼎實而載之於俎此七較長於黍稷  
黍稷之七傳釋棘七不蒙上句簋矂故不以爲取黍稷  
而以爲載鼎實也鄭注又云吉祭杞用棘杞古祇作七  
圓有桃傳棘棗也秋官朝士注樹棘以爲位者取其赤  
心而外刺象以赤心三刺也淮南子時則篇孟冬其樹  
棗高注云棗取其赤心也棘木中心色赤故謂之赤心  
特牲記棘心七刻是吉祭之七用棘心也箋以此喻古  
者主人致客之禮○說文砥底之用或字孟子萬章篇引  
詩作底砥訓平均如砥爲貢賦平均矢訓不偏如矢爲  
賞罰不偏言周家貢賦賞罰之道如此也墨子兼愛下  
篇周詩曰王道蕩蕩不偏不黨王道平平不黨不偏其  
直若矢其易若底君子之所履小人之道不平不黨不  
語道之謂也古者文武爲正均分賞賢罰暴勿有親戚

為興○曉者反顧之兒傳也字當作兒曉言荀子作眷  
焉後漢書作曉然言焉然三字皆語詞說文潛涕流兒  
詩曰潛焉出涕韻會作然荀子有坐篇今之言顧古周道以  
念今則潛焉而涕下矣荀子有坐篇今之言顧古周道以  
其教繫其刑其民迷惑而墮焉則從而制之是以荆溺  
繫而邪不勝今夫世之陵遲亦久矣而能使民勿踰乎  
詩曰周道如砥其直如矢君子所履小人所視眷焉顧  
之潛焉出涕豈不哀哉楊倞注云言失其砥矢  
之道所以陵遲哀其法度墮壞毛傳正用荀子

小東大東杼柚其空傳空盡也糾糾葛屨可以履霜

桃公子行彼周行傳桃桃獨行貌公子譚公子也既往

既來使我心疚疏詩說文云杼機持緯者釋文柚又作軸

桶柚字因杼字從木而改軸亦從木非也案大玄梲篇  
棘木為杼削木為軸杼軸既施民得以煥梲擬之經緯  
法言先知篇田畝荒杼軸空謂之數其字正作軸空盡  
爾雅釋詁文東東國小大東國杼軸盡空則是傷於財

也管子國蓄篇大國內款小國用盡款與空辭之轉  
義與此同下文因言譚困於役之事爾雅釋訓僂僂  
契契愈遐急也郭注云賦役不均小國困竭賢人憂歎  
遠益急切案釋詩僂僂公子契契寤歎也下章傳契契  
憂苦也本爾雅此云僂僂獨行兒者亦謂困竭急切之  
狀與爾雅訓異意同釋文僂僂木或作寤韓詩作耀耀往  
來兒楚辭九歎注作若若玉篇彳部僂僂獨行兒並字  
異而聲同毛檣下行彼周行為訓韓檣下既往既來為  
訓也是詩譚大夫所作故周子為譚公子詩言周行凡  
三卷耳鹿鳴及此也此周行無傳者易曉耳上行為行  
來下行為道楚辭注引作行彼周道即其義言譚公子  
奉使周道往來不已東國之行役譚尤獨受其困乏也  
我譚大夫  
自我也

有冽洿泉無浸穫薪契契寤歎哀我憚人傳冽寒意也

側出曰洿泉穫艾也契契憂苦也憚勞也薪是穫薪尚

可載也哀我憚人亦可息也傳載載乎意也疏冽當作  
列正義

云七月二之日栗冽是冽為寒意也說文冽寒兒故字  
從冰冽訓寒許正用傳訓今說文久部失冽篆仲達所  
見唐本不誤易井九五爻辭井冽寒泉會說文以爲水  
清則冽與冽不同義矣爾雅汎泉穴出穴出又汎水出側  
與仄通邵晉涵正義云說文作厖厖出泉也又汎水出側  
從孔穴疾出也榮側出泉也是側出之泉又曰榮也艾  
釋文作刈穫薪刈穫也穫稻刈稻也穫稗刈稗也穫菽  
刈菽也毛於全詩穫字不傳而此作傳者以穫薪爲析  
薪不謂穫爲木也無浸浸也浸穫薪與哀憚人穫薪一  
正作對文箋讀穫爲穫爾雅穫落樊光注引詩作穫薪  
與毛義異○楚辭九歎孰契契而委陳兮王注云契契  
憂貌也義與此同爾雅釋文及楚辭注契契一作挈挈  
擊鼓傳契闊勤苦也契本亦作挈廣雅雅勞也郭注引  
梁聲通釋文憚字亦作憚小同爾雅雅勞也郭注引  
詩作憚版傳憚病也勞與病義相近說文憚勞也郭注  
載載乎意義不可解小箋云意當作車是也傳訓穫薪  
爲刈薪薪是穫薪上薪字疑是浸字之聲誤箋改穫作  
穫云薪是穫薪者析是穫薪也則鄭所據本已作薪字  
矣亦可息當作不可息與東山篇不可畏也俗本作薪亦  
可畏也其誤正同此承上文反覆言之彼泉浸之刈薪

尚可載乎中哀哉我東國勞人不能止息而自休也若  
作亦可息則與哀我勞人文不相承矣氓士之耽兮猶  
可說也女之耽兮不可說也抑白圭之割  
尚可摩也斯言之割不可為也文正相同

東人之子職勞不來傳東人譚人也來勤也而人之子

粲粲衣服傳而人京師人也粲粲鮮盛貌舟人之子熊

熊是裘傳舟人舟楫之人熊熊是裘言富也私人之子

百僚是試傳私人私家人也百僚是試用於百官也疏

譚國在東故東人為譚人來勤爾雅釋詁文爾雅又云  
勅勤勞也說文勅勞也賁傳勤勞也是勅與勤並有勞  
義來古勅字箋云職主也東人勞苦而不見謂勤謂亦  
勤也○周在而故以西人為京師人粲采一聲之轉今  
北方評好為喝采南方衣服鮮麗為粲聲如餐則重言  
曰采采亦曰粲粲矣爾雅燕燕粲粲尼居息也郭注云  
盛飾宴安近處優閒北山傳燕燕安息之意箋云京師人  
釋粲粲衣服鮮盛兒者亦近處安息之意箋云京師人



衣服鮮絜而逸像舟人舟楫之人卽今月令之榜人是也  
也匏有苦葉傳舟子舟人主濟渡者各隨文訓熊羆裘  
爲富者言得祿多也正月箋云此言小人富而寡陋將  
貴也私人私家人謂私屬之家人也若七子姻黨之類  
家人猶今言人家耳嵩高傳私人家臣也各隨文訓釋  
文僚又作寮說文作寮采芑傳試用也版傳寮官也傳  
文是試上尊百僚二字今依小箋補用於百官此倒句  
法也詩異義云而人之子舟人之子皆對東人之困病  
言私人之子則言羣小得志起下三章曠官廢職意

或以其酒不以其漿傳或醉於酒或不得漿鞞鞞佩璆  
不以其長傳鞞鞞玉貌璆璫也維天有漢監亦有光傳

漢天河也有光而無所明跂彼織女終日七襄傳跂隅  
貌襄反也疏經中或字領下句兼以不言故傳分釋  
也或有也以用也不以不用也不可以不可用也下皆  
同韓詩外傳宋燕相齊見逐陳饒曰三斗之糧不足於

士而君鴈驚有餘栗果園梨栗後宮婦人以相提擲上  
曾不得一嘗綾紈綺縠靡麗於堂從風而舞士曾不得  
以為緣引詩曰或以其酒不以其漿釋文韞又作瑁得  
雅作瑁說文無瑁案韞是也韞韞謂佩玉韞韞然非謂  
玉也傳玉兒常作佩玉兒三字蓋奪一佩字耳說文韞  
大車縛輓軋字亦作韞釋名韞縣也所以縣縛輓也是  
韞有縣繫之義箋云佩韞者以瑞玉為佩兒又集韻然  
依箋亦當有佩字劉昭注輿服志韞韞也縫綬也瑞  
四十即迴珣珣玉佩玉兒可證爾雅瑞珣也縫綬也瑞  
佩瑞即珣珣玉佩玉兒可證爾雅瑞珣也縫綬也瑞  
謂瑞也珣珣玉佩玉兒可證爾雅瑞珣也縫綬也瑞  
正本此詩傳訓遂即瑞之假借字爾雅瑞珣也縫綬也  
箋云徒美其佩而無其德刺其素餐不以長言不用  
其長也周道衰微諸臣曠職下文皆從此句而申言之  
託天象星名以為典○天以喻王也漢天河亦曰雲漢  
棧樸傳及雲漢箋竝云雲漢天河也夏小正七月漢案  
戶傳漢也者河也案戶也者直戶也言正南北也昭十  
七年左傳冬有星孛於大辰西及漢梓慎曰星孛及漢  
漢水祥也又昭八年傳今在析木之津孔疏云釋天析  
木之津箕斗之間漢津也孫炎曰析木以箕斗之析

開是天漢之津也劉炫謂是天漢即天河也天河在箕  
 斗二星之間箕在東方木位斗在北方水位分析水木  
 以箕星為隔隔河須津梁以渡故謂此次為析木之津  
 也不言析水而言析木者此次自南而盡北故依此  
 而名析木也韋昭注周語亦云津天漢也析木次名從  
 尾十度至南斗十一度為析木其川為漢津監視也先  
 者水之光天河無星故傳云有光而無所明○歧俗企  
 字小箋云歧當從說文作岐是也說文七部岐頃也引  
 詩作岐玉篇岐隅兒顧希馮所據毛詩亦作岐岐與  
 音義皆同廣韻云岐者不正也墨子禱守篇其甚害者  
 為築三亭三亭隅織女之令能相救諸蓋織女三星成  
 三角故防禦築三亭以象織女處隅之形文選顏延之  
 詩注引薛君章句襄反也韓與毛同執競傳云反復也  
 七七時也七月終日有七時言織女星歷七時辰而復  
 見於昏是謂之七襄

雖則七襄不成報章傳不能反報成章也睨彼牽牛不

可以服箱傳院明星貌何鼓謂之牽牛服牝服也箱大

車之箱也東有啓明西有長庚傳日旦出謂明星爲啓

明日既入謂明星爲長庚庚續也有挾天畢載施之行

傳挾畢貌畢所以掩兔也何嘗見其可用乎疏報亦反

猶反復箋云織女有織名爾駕則有而無東不如人織

相反報成文章據正義作報反夏小正七月初昏織女

正東鄉初昏見織女在東而不在于西小正七月指夏時

而言○疏唐石經作琬玉篇琬明星也廣韻琬明星皆

本此詩而琬琬錯出疑傳文當作琬明兒星字涉下兩

言明星而誤衍禮記檀弓釋文琬華板反明兒與傳訓

合琬琬三字說文皆不錄而艸部琬從琬聲則說文

有琬字矣爾雅星紀斗牽牛也何鼓謂之牽牛是牽牛

爲星紀或名何鼓何揭也鼓量名實一星也郝懿行義

疏云今驗牽牛三星牛六星牟廷相曰牛宿其狀如牛

何鼓直牛頭上則是牽牛人也何鼓中星最明舉頭卽

見而牛宿差不甚顯詩人觸景據情不妄舍極明之何

鼓而取難見之牛宿琬彼之詠謂何鼓不謂牛宿明矣

毛傳取爾雅爲釋精當不移月令季春旦牽牛中仲秋

詩二十

昏牽牛中皆何鼓也考諸經典無名牛宿曰牽牛者天  
官書云牽牛為犧牲其北河鼓蓋星家失傳自此始今  
按牟說足訂史記之誤郭注云擔鼓擔者荷也擔荷說  
文作儋何今南方農語猶呼此星為扁擔何鼓三星中  
豐而兩頭銳下有儋何之象故此星為扁擔何鼓三星  
鼓牽牛為二星釋爾雅者因之而誤故李巡曰何鼓牽  
牛皆二十八宿名也孫炎曰何鼓之旗十二星在牽牛  
北故或名何鼓為牽牛也爾雅以何鼓左右之旗強名  
李孫之義則二星孫炎又以何鼓左右之旗強名為何  
鼓斯失之矣服虔傳本考工記車人大車崇三柯一  
寸牝服二柯有參分柯之羊車二柯有參分柯之一  
鄭司農注云牝服謂車箱服讀為負羊車謂車羊門也  
釋名立人象人立也或曰陽門在前曰陽兩旁似門也  
案陽與羊通牝即牛服者負之假借字大車重載牛負  
之故謂之牝服既夕禮注云服車箱也說文云箱大車  
牝服也服以負物箱以載物單言服則服為車箱連言  
服箱故傳分釋之服為牝服箱為大車則服為車箱矣  
尺大車崇三柯車崇九尺也牝服二柯有參分柯之  
謂大車八尺也羊車二柯有參分柯之一謂車廣七尺  
也大車任載牛負之不若樂車用馬故車淺較長車廣

較狹棄車前面有版爲軌而後面無版以便升車是謂  
之淺軫大車後面有版爲軾而前面無版以便載物是  
謂之陽門歟說文軾大車後也此大車之箱也詩  
小學云李善思玄賦注引詩皖彼牽牛不可以服箱與  
下文不可用於輓揚不可以挹酒漿句法一例鄭箋云以  
用也不可用於輓揚之箱爲下文二不可以舉例也今  
各本脫不可用字○傳云日且出且當作且正義已誤當從  
小箋本訂正日出東方日且出而明星見於東方是白  
啓明啓闕也開日之明也爾雅明星謂之啓明啓與啓  
同日入西方日既入而明星見於西方是曰長庚庚續  
也猶繼也長猶常也繼日而常明也故箋云啓明長庚  
皆有助日之名而無實光也史記索隱引韓詩云大白  
晨出東方爲啓明昏見西方爲大白則明星亦謂大白星  
爲明星韓傳以啓明長庚爲大白則明星亦謂大白星  
也天官書以明星代啓明以大白代長庚而後之言星  
家遂多異說正義云庚續釋詁文今爾雅作廣書益稷  
疏引詩作廣廣爲庚之譌庚訓續非卽廣字也說文廣  
古文續庚廣同義不同字楚辭九歎立長庚以繼日續  
卽繼也○正義云上言揀長兒此云畢立長庚以繼日續  
也鄭注月令云小而柄長謂之畢漸漸之石傳畢濁也

天官書畢曰旱車為遺兵主弋獵畢星象田弋之畢故傳云所以掩兔十月之交箋行道度也今天畢張施道度而不見其可用亦徒虛也箋用特牲宗人執畢之畢易傳而解經各通

維南有箕不可以簸揚維北有斗不可以挹酒漿傳挹

斟也維南有箕載翕其舌傳翕合也維北有斗西柄之

揭疏曰簸亦揚也說文簸揚米去糠也實之初筵箋仇讀曰斟實手挹酒士冠禮注尊斗所以斟酒也玉篇

挹斟也說文斟挹也挹斟義同箕簸揚斗斟酒漿南箕北斗則不可用也韓詩外傳云言有位無其事也○翕

合常棣般同玉篇引詩作吸云言有也箋翕猶引也鄭讀翕為吸本三家詩義禮記曲禮以箕自鄉而扱之注

扱讀曰吸謂收糞時也少儀執箕膺揭注膺親也揭舌也持箕將去糞者以舌自鄉蓋三家詩作吸訓引舌

內鄉似箕形毛詩作翕訓合說文合人口也△讀若集

合舌者箕四星其舌二星人口行列成箕形皆所以狀

箕星之似箕也斗古料字說文

料勺也杓料柄也揭高舉也

四月八章章四句

四月大夫刺幽王也在位貪殘下國構禍怨亂竝興焉

四月維夏六月徂暑傳徂往也六月火星中暑盛而往

矣先祖匪人胡寧忍予疏傳訓徂為往往暑暑往也六

其暑將往矣興者以喻我周列祖盛德而至幽王之身

其德就衰矣月令季夏之月昏火中昭三年左傳晉張

趯曰辟如火焉火中寒暑乃退此其極也能無退乎杜

注云火心星心以季夏昏中而暑退案暑盛而往即為

暑極而退之意毛傳正本左傳為訓詩凡八章各自為

興不言興者畧也○匪彼也彼猶其也胡寧皆何也先

祖匪人胡寧忍予言先祖其何忍予而降禍亂也與

雲漢父母先祖胡寧忍予文義相同○正義云王肅述

毛於六月徂暑之下注云詩人以後當復闕二月行役至六月

暑往未得反已闕一時之祭後當復闕二時也先祖匪

人之下又云征役過時曠廢其祭祀我先祖獨非人乎

王者何為忍不憂恤我使我不得修子道案王說雖未



得毛惜然其言行役未嘗無據徐幹中論譴交篇以四  
月爲行役過時刺怨而作徐偉長爲漢靈帝末年人其  
解詩正與王子離合則經中四月六月秋日冬日皆爲  
紀時也行役不歸不得養父母卽不得承祀先祖此又  
在久役於外而念及之人情所必至也詩三章烈烈發  
發與蓼莪弟五章同句而二章淒淒爾雅與蓼莪哀哀  
同釋蓼莪序云民人勞苦孝子不得終養六章盡瘁以  
仕寧莫我有與北山或盡瘁事國同解北山序云已勞  
於從事不得養父母則與此詩文義亦甚相同文十三  
年左傳鄭伯與公宴于柴子家賦鴻雁季文子曰寡君  
未免於此文子賦四月文子賦詩或思取歸祭祀卽用  
晉安集之意杜預注云義取行役踰時思歸祭祀卽用  
王子離說行役闕祭毛詩序傳所無而按諸經義三家  
詩亦未嘗無據序云構禍怨亂歎行役亦在其中傳云  
暑盛而往小明篇所云載離寒暑其毒大苦者不妨借  
時以設喻此非毛詩序傳之正解而義實足以兼咳爾

秋日淒淒百卉具腓

傳

淒淒涼風也卉草也腓病也

離瘼矣爰其適歸

傳

離憂瘼病適之也

疏

緣衣傳淒淒涼風也此云淒淒

淒涼風涼寒義通爾雅哀淒淒懷報德也郭注云悲  
苦征役思所生也又廣雅云淒淒哀淒也哀淒即  
我之哀哀父母懷淒即此秋日淒淒之異文卉草出車  
同文選謝靈運戲馬臺詩淒淒陽卉腓李善注引韓詩  
曰秋日淒淒百卉俱腓薛君曰腓變也俱變而黃也腓  
音肥毛萇曰腓病也今本作腓字非案李注當作毛萇  
曰腓病也今本作腓字非今本作腓字非案李注當作毛萇  
賦注王粲公譙詩注引毛詩百卉具腓鮑昭苦熱行渡  
瀘寧具腓注引毛詩秋日淒淒百卉具腓鮑昭苦熱行渡  
也是李所據詩本作腓釋文云腓房非反病也韓詩云  
變也然則陸所見毛韓詩字皆作腓用假借字爾雅腓  
病也郭注云見詩玉篇腓風病也詩云百卉具腓或齊  
魯詩作腓用本字箋云涼風用事而眾草皆病與食殘  
之政行而萬民困病傳意當然也○離憂兔爰斯干同  
今字作羅者非古也瘼病釋詁文桑柔同方言云瘼病  
也東齊海岱之間曰瘼爰於也適訓之於其之歸言歸  
於亂為此憂病也宣十二年左傳引詩曰亂離瘼矣爰  
其適歸歸於怙亂者也夫傳意本左傳說蓋經文亂字  
讀逗離瘼為憂病此毛義也文選潘岳關中詩注引韓  
詩亂離斯莫薛君曰莫散也其所據韓詩作斯莫任昉

為范尚書讓表注引韓君曰瘼散也此瘼字當為莫說苑政理篇云詩不云乎亂離斯瘼爰其適歸此傷離散以為亂者也離散用韓詩義家語辨政篇同今字作瘼者據毛改韓耳家語爰作奚常璩華陽國志引詩作奚其適歸詩小學云疑三家詩有作奚者

冬日烈烈飄風發發民莫不穀我獨何害

**疏** 蓼莪傳云

難也發發疾兒箋云言王為酷虐慘毒之政如冬日之烈烈矣其亟急行於天下如飄風之疾也案傳意當然也○穀生也我我幽王時也民莫不穀我獨何害言人無不貪生者而我何獨遭此害也

山有嘉卉侯栗侯梅廢為棧賊莫知其尤**傳** 廢大也**疏**

箋云嘉善侯維也山有美善之草生於梅栗之下人取其實踐履而害之令不得蕃茂喻上多賦斂富人財盡而弱民與受困窮案傳意當然也○廢大爾雅釋詁文郭注即引此詩釋文云一本作廢大也此是王肅義王子雖所據傳作廢大定本同宋本作怵者乃涉箋而誤尤過也列女傳續編引此詩而釋之云言怵於惡不知

其為過此箋及蕩箋言怙於惡用  
列女傳本三家義而毛意實同

相彼泉水載清載濁我日構禍曷云能穀傳構成曷逮

也疏箋云相視也我視彼泉水之流一則清一則濁刺

成也本傳訓也箋構猶合集也合集即構成之義廣雅構

茨箋內構之言謂宮中所構成頑與夫人淫昏之語構

與構通正義云易逮釋言文今爾雅作過郭注引方言

東齊曰過今方言過作蜎說文過微止也讀若桑蟲之

蜎曷者過之假俗字逮者及也穀生也我日構禍曷云

能穀言我今下國日日成此禍亂及己之身云能獨生

乎

滔滔江漢南國之紀傳滔滔大水貌其神足以綱紀一

方盡瘁以仕寧莫我有疏江漢大水故傳云滔滔大水

者一方指南國紀即綱紀也言江漢之大水南國百川

其神足以綱紀之爾雅神治也魯語仲尼曰山川之靈

足以紀綱天下者其守為神法言君子篇仲尼之道猶  
四瀆也經營中國終入大海他人之道者西北之流也  
綱紀夷貉或入于沱或淪于漢竝與此綱紀同詩言江  
漢綱紀南國不使眾水放縱無所入以興幽王之神不  
足以紀理天下俾下國之諸侯恃強連禍不供王事更  
無江漢朝宗之義○盡瘁與北山盡瘁同仕事也北山  
或盡瘁事國傳云盡力勞病以  
從國事寧猶胡也有相親有也

匪鵠匪鵠翰飛戾天匪鱸匪鮪潛逃于淵傳鵠鵬也鵬

鳶貪殘之鳥也大魚能逃處淵疏釋文云鵠字或作鵠

鵠鵬鵠也鵠字其所據詩字作鵠云鵠鵠鳥也鵠擊殺鳥也廣雅無

鵠鵠鵠也鵠鵬即鵠鵠正義云鵠鵠之大者又名鵠孟康

漢書音義曰鵠大鵬也說文鵠鵠鳥也鵠鵠皆殺害小

鳥故云貪殘之鳥然則正義本作鵠與說文廣雅合釋

文本作鵠後人依釋文改正義又以鵠五各反改說文  
鵠與專反說文注云鵠讀與專反者與鵠鵠韻而又雙  
聲說文鵠鵠也夏小正謂之弋弋即鵠也弋之字變為

葛廣雅疏證云當從鳥戈聲而書作驚驚字古音在元部古從戈聲之字多有讀入此部者故說文閱從戈聲而讀若縣皮從戈聲而讀若環驚之從戈聲而音與專切亦猶是也案作弋作驚說俱有理讀與專反者或出三家詩而毛詩作驚五各反當以說文所據為證旱鹿驚飛戾天箋驚鳴之類鳥之貪惡者也說文注云驚亦當為驚正義引說文驚驚鳥此亦引說文驚驚鳥而從俗寫為驚耳釋詞云匪彼也傳云鳴驚食殘之鳥也者以喻貪殘之人處於高位傳文大魚上疑奪鱣鮪二字云鱣鮪大魚能逃處淵者以喻今民不能逃避禍害是不如矣

山有蘼薇隰有杞桋傳杞枸櫞也桋赤棟也君子作歌

維以告哀疏蘼薇詳草蟲篇杞枸櫞四牡同隰有杞杞

於山也是枸櫞山隰皆有矣桋赤棟爾雅釋木文爾雅又云白者棟郭注云赤棟樹葉細而岐銳皮理錯戾好叢生山中為車輞白棟葉圓而岐為大木邢疏引義疏云棟葉如柞皮薄而白其木理赤者為赤棟一名桋

白者爲棟其木皆堅韌今人以爲車轂案杞榱同類郭景純謂赤棟叢生是已但云赤棟生山中詩言隰榱豈山隰亦皆有此木歟蘇薇之榮杞榱之木山隰足以覆養而有之以喻在位之人不能恩育萬民病困草木之不如○君子席在位之人作此詩歌以告哀於君子此倒句也正義謂作者自言君子似非詩指君子作歌與吉甫作頌不同也

北山六章三章章六句三章章四句

北山大夫刺幽王也役使不均已勞於從事而不得養其父母焉

陟彼北山言采其杞借借士子朝夕從事傳借借強壯

貌士子有王事者也王事靡盬憂我父母疏北山采杞以喻勞於

從事言語詞○借借爲強壯強當作彊說文借彊也引詩借借士子本傳訓也大玄彊次四爰聽爰明左右彊

疆測曰爰聰爰明庶士方來也又增上九測曰羣士疆  
疆偕偕與疆疆同士讀為事傳云士子有王事者王事  
將旅力方剛經營四方即其義箋云靡無也監不堅固  
也王事無不堅固故我當盡力勤勞於役久不得歸父母思己而憂

溥天之下莫非王土率土之濱莫非王臣

溥大率循

濱涯也大夫不均我從事獨賢

傳賢勞也

疏溥大率循

劉同溥天之下昭七年左傳東周策孟子萬章荀子君  
子韓子說林上忠孝呂覽慎人新書匈奴白虎通義封  
公侯喪服史記漢書司馬相如傳韓詩外傳皆作晉聲  
通率循釋詁文率古達字古文作率漢人作達今率行  
而達廢矣縣訪落同濱古當作瀕漢書王莽傳白虎通  
義封公侯喪服兩篇引詩作賓為假借字說文無涯字  
采蘋傳作涯○大夫在上位者席大夫不直席幽王也  
節南山傳均平也不均序所謂役使不均也我有王事  
者自我也傳誥賢為勞者廣雅賢勞也王念孫疏證云  
孟子萬章篇引詩而釋之曰此莫非王事我獨賢勞也



賢亦勞也賢勞猶言劬勞故毛傳曰賢勞也鹽鐵論地廣篇亦曰詩云莫非王事而我獨勞刺不均也鄭箋趙注並以賢為賢才失其義矣案王說是也我從事獨賢序云已勞於從事是賢勞同也襄十三年左傳引詩而釋之云言不讓也亦謂大夫不知讓不讓與不均同意此詩專刺幽王役使不均從事獨勞是即不均也首章言王事靡盬憂我父母又推獨勞者之情孟子云是詩也勞於王事而不得養父母也統釋首章與序言不得養父母合下章及末三章言獨勞不均皆從此章之義而申說之

四牡彭彭王事傍傍傳彭彭然不得息傍傍然不得已

嘉我未老鮮我方將旅力方剛經營四方傳將壯也旅

眾也疏蒸民箋彭彭行兒傍當作傍說文傍附行也彭

傍云不得已互文見義也○未老方將對文故傳訓將為壯方將即方壯也射義幼壯孝弟壯或為將爾雅樊駟也樊與壯同樊孫本作將此皆壯將聲通之證旅眾釋詁文大明同桑柔靡有旅力與此旅力同秦誓番番

良士旅力既愆周語四軍之帥旅力方剛孔傳韋注並云旅衆也逸周書大明武篇我師之窮靡人不剛鹽鐵論繇役篇詩云獫狁孔熾我是用戒武夫潢潢經營四士守禦征伐所由來久矣並與此詩同

或燕燕居息傳燕燕安息貌或盡瘁事國傳盡力勞病

以從國事或息偃在牀或不已于行疏燕安也重言曰燕燕爾雅燕燕

尼居息也字又作宴宴傳云安息義同或盡瘁事國昭七年左傳引詩盡瘁作憔悴漢書五行志所載左傳作盡頽鄭注周禮小司寇云謂憔悴以事國其所據詩作憔悴字異義同傳云盡力勞病以釋盡瘁二字語雖分釋而義實平列也云以從國事釋經事國二字倒句以釋之已止也行道也

或不知叫號傳叫呼號召也或慘慘劬勞或棲遲偃仰

或王事鞅掌傳鞅掌失容也疏叫號連縣字說文口部叫號也嘒號也言部計

大嘒也評召也碩鼠傳號呼也古嘒評呼通用叫謂之嘒嘒又謂之號號謂之呼評又謂之召是叫呼號召四

字同義也。慘慘釋文：字亦作慄慄，是也。衡門傳云：棲遲游息也。仰釋文作印，鞅掌疊韻，連縣字。鞅掌失容，猶言倉皇失據耳。正義云：傳以鞅掌為煩勞之狀，故云失容。言事煩，鞅掌然不暇為容儀也。今俗語以職煩為鞅掌，其言出於此傳也。案莊子：庾桑楚篇，鞅掌之為使，郭象注云：鞅掌不自得。宋陳景元校本有不字。今各本奪不可通矣。崔謨云：不仁意司馬彪云：醜貌，竝與失容義近。又在宥篇：遊者鞅掌以觀，無矣。鞅掌亦浮遊動容之意。

或湛樂飲酒，或慘慘畏咎，或出入風議，或靡事不為。疏  
湛亦樂也。讀為酖，連言湛樂般樂也。連言般樂娛樂也。連言娛樂愉樂也。連言愉樂喜樂也。連言喜樂康樂也。連言康樂皆其例。慘慘亦慄慄之。誤箋云：咎猶罪過也，風猶放也。

無將大車三章章四句

無將大車，大夫悔將小人也。

無將大車祇自塵兮傳大車小人之所將也無思百憂

祇自底兮傳底病也疏大車與王風大車不同考王記

平地載任之車晉語以傳召伯宗遇大車當道而覆韋

注云大車牛車也詩以大車喻小人將大車喻進小人

傳云大車小人之所將也者但釋經之大車而進舉小人適

明也我行其野傳祇適也箋云喻大夫而進舉小人適

自作憂累故悔之易林井云大輿多塵小人傷賢皇甫

司徒使君失家亦此義也○底石經作疾不誤疾病釋

詁文白華俾我底兮傳亦云底病也詩小學云詩三用

此字為韻白華與卑韻何人斯祇與易知箴知斯韻此

皆弟十六部本音何人斯俗地祇字為之於六書為假

俗若無將大車之疾而與弟十二部之塵韻讀若真此

古合韻之例又云張衡賦思百憂以自疾疾與底音近

禮記畛於鬼神鄭注畛或為祇又說文祇一作脈古标

氏讀如權精於此可求合韻之理

釋文都禮反是唐初誤作底也

無將大車維塵冥冥無思百憂不出于頌傳頌光也疏

荀子大畧篇君人者不可以不慎取臣匹夫者不可以不慎取友友者所以相有也道不同何以相有也均薪施火火就燥平地注水水流溼夫類之相從也如此之箸也以友觀人焉所疑取友善人不可不慎是德之基也詩曰無將大車維塵冥冥言無與小人處也又韓詩外傳云今子所樹非其人也故君子先擇而後種也詩曰無將大車惟塵冥冥案此釋詩並與序傳合箋云冥冥者蔽人目明令無所見也猶進舉小人蔽傷己之功德也○頌先釋詁文箋云使人蔽闇不得出於光明之道

無將大車維塵雖兮無思百憂祇自重兮疏箋云雖猶蔽也重猶累也

小明五章三章章十二句二章章六句

小明大夫悔仕于亂世也

明明上天照臨下土我征徂而至于芄野二月初吉載

離寒暑傳芄野遠荒之地初吉朔日也心之憂矣其毒

大苦念彼其人涕零如雨豈不懷歸畏此罪罟傳罟網

也疏明明注明明猶昭昭昭昭禮記中庸篇今夫天斯昭昭之多鄭

之明其光甚微以喻世亂則闇於照察故詩以小明名

篇○芄野遠荒之地說文芄遠荒也从艸九聲引詩本

傳訓也古謂朔為吉傳以朔日又異吉月月朔為一月之

與吉月不同而朔日與月朔又異吉月月朔為一月之

始一日初吉者謂吉月之始朔日者謂月朔之日不必

定在始一日自一至十皆是也二月夏正之二月或謂

此二月為周之二月者非也箋云我行往之西方至於

遠荒之地乃以二月朔日始行至今則更夏暑冬寒矣

尚未得歸案鄭說是也二月初吉豕上我征徂而句即

下雨章云晉我往矣日月方除晉我往矣日月方與也

載離寒暑即下雨章云曷云其還歲聿云莫也經言先

寒後暑箋乃以夏暑冬寒釋之蓋揆下采蕭穫菽已狂

秋冬之交為言此面行之大夫固為歷寒未歸而作也

詩五章前三章每章下六句作對耦法上六句用錯綜



云念彼恭人涕零如雨豈不懷歸畏此罪罟案桓引詩亦以彼爲古而此爲今春行秋反寒暑未變云云卽解二月初吉意繇役極遠盡寒苦之地云云卽解至于野意此雖非全引詩辭正是依詩辭爲說則二月爲春行面京舊說有可證也

咎我往矣日月方除傳除除陳生新也曷云其還歲事

云莫念我獨兮我事孔庶心之憂矣憚我不暇傳憚勞

也念彼其人睠睠懷顧豈不懷歸畏此譴怒疏咎我往矣日月

方除此追溯其我往之時也悉蟀除去也天保除開也去者除陳開者生新除字兼有此二義管子度地篇天氣下地氣上萬物交通故事已新事未起其下卽云寒暑調日夜分分之後夜日益短晝日益長利以作土功之事案此與傳訓同汪龍詩異義云傳訓除爲除陳生新指二月也史記律書卯之爲言茂也言萬物茂也白虎通義卯者茂也漢書律曆志冒萌於卯說文卯冒也萬物冒地而出象開門之形故二月爲天門徐氏錯曰



天門萬物畢出也釋名非冒也載冒土而出也傳以除  
陳生新為二月義致確矣箋引爾雅四月為除釋言我  
往矣為往至於芄野爾雅四月為余雖除余義通但經  
言咎我往矣是追溯始行之時釋往為往到義終未安  
○釋文憚字亦作瘳徐音旦徐仙民所據詩作瘳矣今  
大東雲漢皆作憚訓勞憚為瘳之假借大東傳瘳反顧  
兒重言曰睠睠箋云睠睠有往仕之志也王注楚辭九  
歎引詩李注文選王粲登樓賦張衡思玄賦謝惠連獻  
康樂詩引韓詩並作瘳  
眷懷顧說文有眷無睠

咎我往矣日月方輿傳輿煖也易云其還政事愈蹙傳

蹙促也歲聿云莫采蕭穫菽心之憂矣自貽伊戚傳戚

憂也念彼其人興言出宿豈不懷歸畏此反覆疏輿煖

唐無

衣同輿為煖古文假借詩異義云說文煖溫也七月春  
日載陽箋陽溫也二月萬物畢出陽氣方盛經言方輿  
傳以煖解之亦致確也且二月初吉為始行而咎我往  
矣則不定指初吉之一日即二月之末接於三月初

凡在征途皆可言經方與在方除下設文本有次弟疏  
既以春溫申傳復引洪範疑爻當爲夏謂二月之初援  
於正月之末時尚有霜不可云煥其言非也案汪說允  
當唯解初吉爲一日自誤○暉古祇作威威訓爲促者  
以疊韻爲訓召曼傳云威促也與此同今經典訓促急  
字皆作暉子六反非古義古音也凡古今文字日以滋  
廣實由方語之殊引申假借之用故存字必有數音數  
義解經者隨文立訓生而不窮如公劉傳威斧也威  
之本義而此句政事愈威訓促下句自詒伊威訓憂言  
各有當不妨字同而義異也此故訓用字之通例蕭萬  
也菽九穀中最後穫者享菽采菽皆其葉也至此則稱  
穫矣淮南子墜形篇云菽夏生冬外○威古憾字說文  
憾憂也字亦作暉伊維也雄雉箋伊當作繫繫猶是也  
正義云箋以宣二年左傳自詒繫惑小明云自詒伊威  
爲義既同故此及葉葭東山白駒各以伊爲繫小明不  
易者以伊惑之文與左傳正同爲繫可知案據此則孔  
所見左傳作繫與此詩作伊義同矣九戩傳云宿猶處  
也與言出宿言將起而出處仕於治朝也與上睦睦懷  
願同意反亦覆也

反覆猶反側也

嗟爾君子無恆安處靖其爾位正直是與傳靖謀也正

直爲正能正人之曲曰直神之聽之式穀以女疏爾女

子席王也恆常也無常於安處安息以起下文靖其好

與之意荀子勸學篇君子博學而日參省乎己則知明

而行無過矣其下即引詩曰嗟爾君子無恆安息靖其

爾位好是正直神之聽之介爾景福楊注云無恆安息

戒之不使懷安也漢書董仲舒傳武帝策賢良制曰詩

不云庠嗟爾君子毋常安息神之聽之介爾景福顏注

云言人君不當苟自安處而已此其義也○靖謀爾雅

釋詁文召旻我將同其即其人末二章承上三章念彼

其人而言所以傷今而思古也襄七年左傳引此詩而

釋之恆民爲德正直爲正正曲爲直參和爲仁如是則

神聽之介福降之傳云正直爲正能正人之曲爲直其

釋詩正直二字即用左傳文左傳恆民爲德句以釋詩

之靖字杜注云靖其其位所以恆民是也傳訓靖爲謀

謀所以恆民當亦本諸左傳召旻實靖夷我邦我將日

靖四方傳皆云靖謀也皆謂謀治民人意義相同靖其

爾位則指明君矣大夫有恆民之責故引詩可斷章取

義而要之詩意在刺幽王自不指在位之大夫禮記緇衣篇云有國者章善癉惡以示民厚則民情不貳亦引此詩箋指明君說不誤乃訓其為具謂謀具女之爵位與其人箋義不可通其不得稱具人也

嗟爾君子無恆安息傳息猶處也靖其爾位好是正直

神之聽之介爾景福傳介景皆大也疏兩息猶處傳謂末

章無恆安息處此章無恆安息安息猶安處也般其靈二

章莫敢遑息三章莫敢遑處遑息猶遑處也葛生一章

誰與獨處二章誰與獨息獨息猶獨處也浮游一章於

我歸處二章於我歸息歸息猶歸處也傳皆云息止也

○介大爾雅釋詁文生民同說文介大也方言介大也

東齊海岱之閒口介今字通作介猶奄大也今作純第大

今作佛假借行而本義廢矣景大亦釋詁文車牽玄鳥

同景者京之假借左傳云介福降之則介福為大福也

箋訓介為助非傳義上章式穀以女爾女通稱穀善也

穀女猶言介爾鄭於表記注云用祿與女是矣箋云其

用善人則必用女亦非傳義

鼓鍾四章章五句

鼓鍾刺幽王也

**疏**

正義云鄭於中候握河注云昭王時鼓鍾之詩所為作者鄭時未見毛詩

依三家為說也

鼓鍾將將淮水湯湯憂心且傷**傳**幽王用樂不與德比

會諸侯于淮上鼓其淫樂以示諸侯賢者為之憂傷淑

人君子懷允不忘

**疏**

鍾當作鐘今鍾鐘通用鼓鐘擊鐘

出入奏肆夏實為諸侯詩言幽王會諸侯則所謂鼓鐘者奏王夏與肆夏也凡饗食賓射尚金奏故詩四章皆言鼓鐘說文鎗鐘聲也鐘聲為鎗重言曰鎗鎗將將古文假借執競傳云將將集也載驅傳云湯湯大兒案上句言鼓鐘而下句即言淮水是用樂於淮水之上也淮水之上非方嶽觀諸侯之地今幽王會諸侯而用先王之樂是不與先王之德比矣不與德比即為淫樂此傳總發全章之指賢者為之憂傷以釋憂心且傷句箋云

爲之憂傷者嘉樂不野合儀象不出門今乃於淮水之上作先王之樂失禮尤甚嘉樂不野合儀象不出門定十年左傳文史記魯世家稱孔子誅齊淫樂鄭引之以申明此傳之義王肅亦云几作樂而非所則謂之淫淫過也○釋詞云允語詞懷允不忘懷不忘也

鼓鍾喈喈淮水涔涔憂心且悲傳喈喈猶將將涔涔猶

湯湯悲猶傷也淑人君子其德不回傳回邪也疏將將

聲之作喈喈猶然也喈讀如入音克諧之諧湯湯爲水流之大涔涔猶然也說文云涔水流涔涔也悲傷同義憂心且悲猶云憂心且傷耳回邪小旻同

鼓鍾伐鼗淮有三洲憂心且妯傳鼗大鼓也三洲淮上

地妯動也淑人君子其德不猶傳猶若也疏鼗傳亦云

長丈二尺淮南子主術篇鼗鼓而會高注鼗鼓王者之食樂也引詩鼓鍾伐鼗鼗鼓當作伐鼗王海一百九引

淮南正作伐磬而會荀子正論篇代皋而會皋與磬通  
代乃伐之誤淮南即本於荀子也春官大司樂王大食  
三侑皆令奏鍾鼓即其事也說詳王念孫荀子襍志○  
三洲淮上地未詳朱右曾云按水經注淮水又東爲安  
豐津淮中有洲俗號開洲蓋津關所在故斯洲納厥稱  
焉通校全淮惟此有洲在霍邱縣北也左傳周幽爲  
大室之盟戎狄叛之潁水源於大室而入於淮意王旣  
會遂浮潁入淮數穆天子之浮于葵水以奏廣樂宣其  
汰侈于諸侯而不知戎狄之竊發此賢者所以聞樂而  
拊心也與今攷方輿紀要江南鳳陽府壽州霍邱縣  
西南二十里有安風城或譌風爲豐大業陂縣東北十  
五里周二十餘里人呼爲水門塘相傳古名鎮淮洲陷  
而爲陂淮水在縣北三十里自潁州流入境又東北接  
潁上縣界自霍邱縣而東經正陽鎮潁水流合焉漢志  
潁水出陽城縣陽乾山東至下蔡入淮其入淮處謂之  
潁尾左傳昭十二年楚子狩於州來次于潁尾亦曰潁  
口下蔡城即古州來也是淮洲陷成陂當在潁尾入淮  
之處又案釋止淮南有州黎丘邵正義引劉台拱經傳  
小記鹽鐵論論儒篇孔子能方不能圓故飢于黎丘哀  
公二年蔡遷于州來四年孔子自陳適蔡絕糧鹽鐵論

所謂黎丘蓋卽州黎之丘也晉志淮南郡壽春縣今爲安徽鳳陽府壽州○妯動釋詁文箋妯之言悼也古由卓聲同鄭不以妯悼同訓而以鼓鐘之妯讀同悼猶以苑柳之蹈讀曰悼謂妯蹈皆卽悼也檜羔裘傳云悼動也說文心部引詩憂心且妯妯聲相近猶若少星同十二引韓詩憂心且陶妯陶聲亦相近

鼓鍾欽欽鼓瑟鼓琴笙磬同音傳欽欽言使人樂進也

笙磬東方之樂也同音四縣皆同也以雅以南以簫不僭傳爲雅爲南也舞四夷之樂大德廣所及也東夷之

樂曰昧南夷之樂曰南西夷之樂曰朱離北夷之樂曰

禁以爲簫舞若是爲和而不僭矣疏賓入門則金作故

樂進也冕鷩傳欣欣然樂也欽欣一聲之轉廣雅釋訓

欽欽聲也鼓瑟鼓琴瑟琴在堂上也歌詩以弦之下文

言樂舞皆在堂下○儀禮大射儀樂人宿縣于阼階東

笙磬西面其南笙鍾而階之西頌磬東面其南鍾鄭注



云笙猶生也東爲陽中萬物以生言成功日頌而爲陰  
中萬物之所成鍾不言頌省文也周禮眠瞭掌擊頌磬  
笙磬注云磬在東方日笙笙生也在西方日頌頌或作  
庸功也大司樂疏引書笙庸以閒注云東方之樂謂之  
笙笙生也東方生長之方故名樂爲生也庸者西方之  
樂謂之庸庸功也而方物熟有成功亦謂之頌頌亦是  
頌其成也然則鄭亦以鐘磬之在面者爲頌在東者爲  
笙矣詩言笙磬不言頌磬言磬不言鐘皆省文也傳釋  
笙磬爲東方之樂者舉東方以咳面方亦舉磬以咳鐘  
也云同音四縣皆同也者此總釋四面縣之義小胥正  
樂縣之位王宮縣鄭司農注云宮縣四面縣四面象宮  
室四面而有牆故謂之宮縣逸周書大匡篇國不鄉射樂  
不牆合孔注云牆合卽所謂宮縣是也案逸周書言牆  
合卽鄭司農所謂象宮室四面而有牆也凡周樂縣之制  
編磬編鐘各一四面設縣其八縣此外之縣者鍾二縣  
在東而兩行之南特磬一縣在堂下之音者堂下樂器之音  
縣在頌磬之而四縣皆在堂下同音者堂下樂器之言  
同也同之爲言均也調也此不兼堂上樂器而言正義  
以爲堂上之琴瑟與堂下之磬鍾皆同其聲音不相奪  
倫失傳指矣○以雅以南傳云爲雅爲南爲釋經之以

玉篇以爲也全詩以與爲同義者放此雅止樂舞六代之樂也南夷樂也詩但言南夷之樂傳乃兼言四夷之樂以補明經義不言雅者以易曉畧耳周禮旄人掌教舞夷樂鄭注云夷樂四夷之樂亦皆有聲歌及舞鞀鞀氏掌四夷之樂注云四夷之樂東方曰韎南方曰任西方曰侏離北方曰禁詩云以雅以南是也王者必作四夷之樂一天下也何休昭二十五年公羊傳注云王者舞六樂于宗廟之中舞先王之樂明有法也舞己之樂明有制也舞四夷之樂大德廣及之也東夷之樂曰柶南夷之樂曰任面夷之樂曰禁北夷之樂曰昧蔡邕獨斷同白虎通義禮樂篇引河間獻王樂元語樂先王之樂明有法也興其所自作明有制也與四夷之樂明德廣及之也故東夷之樂曰朝離南夷之樂曰南而夷之樂曰昧北夷之樂曰禁合觀之樂儔於堂四夷之樂陳於右先王所以得之順命重始也案觀當作歡右疑門字之誤劉達魏都賦注引韓詩內傳王者舞六代之樂舞四夷之樂大德廣之所及後漢書陳禪傳尚書陳忠曰古者合歡之樂舞於堂四夷之樂陳於門故詩云以雅以南韎任朱離葢忠引三家詩韎任朱離以釋詩之南與毛傳昧南朱離禁以釋詩之南其義正同非三

家詩增多四字也雅樂在門內堂下夷樂在明堂四門之外白虎通義所謂夷狄無禮義不在內是其義也禮記明堂位篇昧東夷之樂也任南蠻之樂也納夷蠻之樂於大廟言廣魯於天下也又云大廟天子明堂魯大廟與天子路寢明堂同制唯魯明堂無西北夷樂或下於天子故但納夷蠻樂於大廟而設其樂於路寢明堂外也天子路寢明堂外有四門巡狩會諸侯築明堂其外亦有四門九夷八蠻六戎五狄來朝立於明堂四門之外因以舞其樂焉樂元語東夷之樂持矛舞助時生也南夷之樂持羽舞助時養也西夷之樂持戟舞助時殺也北夷之樂持干舞助時藏也西夷之樂持矛舞助時劉向五經通義同此四夷之樂皆有舞故毛韓詩傳並云舞四夷之樂也傳謂籥爲籥舞不僭爲和而不僭抑傳僭差也此總釋雅南也賓之初筵傳云秉籥而舞與笙歌相應所謂爲和而不僭也總釋雅南則上文鐘磬琴瑟包在其中矣天子會同築壇觀侯其舞常有干舞不言干舞而但稱籥舞者尚德之義也舉文舞以咳武舞故但以籥言春秋經萬入去籥禮記仲尼燕居武夏籥序興皆是也鄭易傳以雅爲萬舞萬舞爲干舞而於此詩經傳意不合○案末章陳古樂意承上三章淑人

君子謂用樂與德比者也

### 楚茨六章章十二句

楚茨刺幽王也政煩賦重田萊多荒饑饉降喪民卒流

亾祭祀不響故君子思古焉

疏詩先言民事而及神響獲福也陳古以刺今

楚楚者茨言抽其棘

傳

楚楚茨棘貌抽除也自咎何爲

我藝黍稷我黍與與我稷翼翼我倉既盈我庾維億

傳

露積曰庾萬萬曰億以爲酒食以享以祀以妥以侑以

介景福

傳

安安坐也侑勸也

疏

牆有茨傳云茨疾藜也玉藻注齊當爲楚薺之

薺楚薺卽楚茨鄭所據三家有作楚楚者薺也王注楚辭引楚楚者薺玉篇薺茨藜也三角刺人茨薺薺竝同楚木有棘故楚楚爲茨棘兒抽除雙聲棘卽茨棘也牆有茨傳襄除也義同訓亦同○自咎何爲句承上生下

自晉猶云自古言自古墾田之法如是是何爲平爲我  
農夫將種藝黍稷故也說文引此詩作瓚今通作藝說  
文旗旗眾也从扌與聲是與與有眾義廣雅云翼翼盛  
也說文倉穀藏也庾倉無屋者甫田箋庾露積穀本此  
傳訓也周語云野有庾積露積卽野積胡廣漢官解詁  
在邑曰倉在野曰庾蓋庾木爲在野積穀之稱故亦謂  
庾爲倉也萬萬曰億伐檀同詳伐檀篇○以者以黍稷  
也凡酒會以黍稷爲之享祀又以黍稷爲主也天保吉  
蠲爲饋是用孝享傳饋酒會也享獻也文義相同安  
坐爾雅釋詁文禮記郊特牲舉角詔安尸鄭注云尸  
始入舉奠若奠角將祭之祝則詔主人拜安尸使之  
坐尸卽至尊之坐或時不自安則以拜安之也天子其  
學諸侯其角禮器云周坐尸少牢特牲皆拜安尸則自  
天子以下同也拜安尸在薦孰之後侑訓勸侑尸謂勸  
尸會也特牲饋食禮尸三飯告飽祝侑主人拜尸又三  
飯告飽祝侑之如初尸又三飯告飽祝侑之如初卽注  
云三飯告飽禮一成也侑勸也或曰又勸之又使會有  
司徹注士九飯大夫十一飯其餘有十三飯十五飯賈  
疏云諸侯十三飯天子十五飯案此侑尸之禮也以介  
景福祝爲主人獻神之辭禮運所謂祝以孝告也小明

傳云介景  
皆大也

濟濟蹢蹢絜爾牛羊以往烝嘗或剝或亨或肆或將

濟濟蹢蹢言有容也亨飪之也肆陳將齊也或陳于互

或齊其肉祝祭于祊祀事孔明

神保是饗皇大保安也孝孫有慶報以介福萬壽無

疆疏禮記曲禮下篇大夫濟濟士蹢蹢鄭注云皆行容

謂助祭之大夫士矣絜爾牛羊以往烝嘗正義云司徒

奉牛司馬奉羊也瓠葉羹亨孰也飪孰同義剝亨猶割

亨也絜露質文篇先亨而後用樂此即周人尚臭之義

也肆陳行葦同說文云肆極陳也將齊釋言文或陳於

互者周禮牛人凡祭祀共其牛牲之互注互若今屠家

縣肉格買疏云始殺解體未薦之時且縣於互待解訖

乃薦之是也或齊其肉者王肅云分齊其肉所當用案

將讀與醬同說文醬醢也古文作𩇛醢則分齊其肉之

細者也是將有分齊之義禮運篇腥其俎孰其散鄭注腥其俎謂豚解而腥之及血毛孰其散謂體解而燔之孔疏云特性九體肩一臂二肱三肫四胙五正脊六橫脊七長脅八短脅九少牢則十一體加以脰脊代脅爲十一體也是分豚爲體解孰其散謂體解訖以湯燭之不全熱次於腥而薦之堂故祭義曰燭祭祭腥而退是也然則分豚體解卽所謂分齊其肉也此言天子朝踐薦腥之事而云或亨者類相及耳文不次也○爾雅開謂之門李係注竝云廟門也門曰閤門內之祭曰祫說文繫門內祭先祖所以徧皇也詩曰祝祭于廟或从方作祫言門內本毛義也凡祭宗廟之禮廟主藏於室中于其祭也祝以詔告之所謂直祭祝于主也廟門之內皆祖宗神靈所馮依焉孝子不知神二所在其祭也祝以博求之所謂索祭祝于祫也祭當在事尸之前至繹祭主未納室故無詔室之祭亦必無索神之祭鄭注禮記以祫爲繹宜於廟門外箋詩又以門內爲大門內非廟門內康成初不治毛詩而箋詩常自用其禮注孔疏曲爲護解廟門外爲繹祭之祫廟門內爲正祭之祫則詩之祫與禮記郊特牲禮器之祫爲二祭矣江都焦循宮室圖云繹祭之名見於諸經者絕不與祫混

祊皆正祭索神之名所云爲祊於外而出於祊者皆對室中言非門外也焦說是矣明謂昭明也○傳訓皇爲大係爲安言先祖之神靈於是大安之則於是饗之也下神保是格神保聿歸保皆訓爲安饗神饗之也孝孫有慶報以介福萬壽無疆此祝爲尸致福於主人之辭禮運所謂嘏以慈告也凡妥侑之後祝致嘏辭士尸親嘏大夫以上命祝嘏少半饋會禮尸命祝祝以嘏于主人曰皇尸命工祝承致多福無疆于女孝孫來女孝孫使女受祿于天宜稼于田眉壽萬年勿替引之是其義也

執爨踏踏爲俎孔碩或燔或炙傳爨饗爨廩爨也踏踏

言爨竈有容也燔取腍骨炙炙肉也君婦莫莫爲豆孔

庶爲賓爲客傳莫莫言清靜而敬至也豆謂內羞庶羞

也繹而賓尸及賓客獻酬交錯禮儀卒度笑語卒獲傳

東面爲交耶行爲錯度法度也獲得時也神保是格報





也世婦之職在蒞陳內羞之物而女御又贊世婦者卽下文所云爲豆孔庶也說詳何楷世本古義說文漢清也莫與漢同傳云清靜敬至此謂正行祭祀之時有司徹宰夫羞房中之羞于尸侑主人主婦皆右之司士羞庶羞于尸侑主人主婦皆左之注云二羞所以盡歡心房中之羞其饌則糗餌粉羞其豆則醢醢會糝會庶羞羊臠豕臠皆有醢醢房中之羞內羞也內羞在右陰也庶羞在左陽也適人羞適之實注卽引二羞羞豆與羞適同則詩之豆爲羞豆也案天子賓尸之禮既已故傳本大夫賓尸言之大夫賓尸尸侑主人主婦皆有二羞則天子賓尸尸侑及王與后皆有二羞可知雖賓客獻酬亦設之也據少牢正祭尸會舉之時羞庶羞而不羞內羞荊溪任啓運天子肆獻裸饋會禮云王不獻祝王與后未交致爵內羞庶羞於何用乎若謂釋祭獻祝致爵內羞庶羞皆爲飲酒設故至旅酬乃用也案任說是也詩言設俎薦孰之後因直說到賓尸設豆之時故傳釋經爲豆卽據賓尸之豆有內羞庶羞爲訓經於爲賓爲客句以起下獻酬傳乃補明經義云釋而賓尸及賓客謂釋祭賓尸之禮始及賓客也絲衣序釋賓尸也穀梁

傳釋者祭之旦日之享賓也傳意順經作釋正義謂豆  
先於祭時豫作以待賓客則經文賓客獻酬皆成豫作  
泛詞失經傳旨矣○釋文醕又作酬酬旅酬也特牲饋  
食禮主人酬賓之解奠於薦北賓取之奠於薦南主人  
獻長兄弟眾兄弟及內兄弟後於是賓取主人酬賓之  
解主婦及內賓宗婦亦旅酬賓眾賓又酬眾兄弟交錯以  
辯其儀節依男子有司徹旅酬賓三獻後使二人舉解  
於尸侑尸酬主人主人酬侑伯酬長賓至眾賓與兄弟  
及私人交錯其酬皆是以尊酬卑中庸云旅酬下爲上  
所以逮賤也特牲士禮上不賓尸有司徹大夫賓尸其  
旅酬儀文不同而獻酢酬以及旅酬爲繹祭祭畢之禮故中  
同天子諸侯明日賓尸則旅酬爲繹祭祭畢之禮故中  
庸旅酬卽繼之以燕毛序齒也傳釋交錯之義云東西  
爲交者東而二解並旅旅行也東面行謂之交也云邪  
行爲錯者邪與裏同錯者道之假借字東面而裏行者  
謂之道也大玄瑩篇東而爲緯南北爲經緯交錯邪  
正以分與傳訓同禮記坊記篇子云七日戒三日齊承  
一人焉以爲尸過之者趨走以我敬也禮酒在室醒酒  
在堂滯酒在下示民不淫也尸飲三杯賓飲一示民有

上下也因其酒肉聚其宗族以教民睦也故堂上觀乎  
室堂下觀乎上詩云禮儀卒度笑語卒獲傳釋度爲法  
度卽示不淫示民有上下之義也祭祀之時清靜而敬  
至至獻酬時則笑語不禁卽教民睦之義也故傳云獲  
得時也儀當作義韓詩外傳四引詩禮義卒度箋云古  
者於旅也語○格來爾雅釋言文方言格來也自關而  
東周鄭之郊齊魯之間或謂之格格與格通酢報釋詁  
文瓠葉酌言酢之傳云酢報也訓同而義異瓠葉之酢  
報爲賓報主人之獻引申之則凡報皆曰酢也來來饗  
介大也萬壽攸酢言報之以萬壽也洪範五福一日壽  
案此章及明日釋祭祭畢而饗燕賓客由饗燕而推本  
於神報介福則祀事至此畢矣下三章又復敘祭祀始  
末以明思古之情

我孔熯矣式禮莫愆傳熯敬也工祝致告徂賚孝孫傳  
善其事日工賚予也苾芬孝祀神嗜飲食卜爾百福如  
幾如式既齊既稷既匡既敕傳幾期式法也稷疾敕固

也永錫爾極時萬時億

(疏)

箋云我我孝孫也漢敬釋詁文小箋云煢即懋之假借字

說文懋敬也式用愆過也式禮莫愆即上章禮義卒度之意○正義云論語曰工欲善其事故云善其事曰工

工祝致告此正祭工祝告利成也凡正祭告利成後有神餽受福之儀節下文正言其事祖讀為且與下祖位

之祖不同義祖賚孝孫且賚孝孫也古祖且聲通賚子釋詁文子孝孫即下文之卜爾也少牢禮上簪親嘏曰

主人受祭之福胡壽保建家室簪古文作餽說文苾馨香也芬艸初生其香分布也或作芬是苾芬皆香也重

言苾苾芬芬箋苾苾芬芬有馨香矣文選蘇武詩注引韓詩蘩芬孝祀眾經音義卷十四引韓詩同薛君章句

云馥香兒也馥即苾之異體故說文艸部錄苾而香部不錄馥爾雅享孝也孝可訓為享天保載見皆云孝享

孝亦享也孝祀即享祀也享祀則神饗之神嗜飲食是即神餽矣卜即賚也天保傳卜子也○幾讀與期同此

假借字也如期承卜爾百福句式法下武同如式承苾芬孝祀句大字一日祭祀之式是也既齊既稷既匡既

敕只承如式句永錫爾極時萬時億又承如期句稷讀為速爾雅速疾也誤音速稷誤皆從曼聲其讀當同故

稷與敕合韻也敕讀爲飭說文飭致堅也从人力會聲  
讀若敕飭敕不同部許讀同者其類相近故其義相通  
也致堅者固之謂也稷飭同部速敕同部敕讀爲飭猶  
稷讀爲速並於雙聲得義齊亦疾也爾雅齊疾也又云  
匡正也固與正義相近齊稷匡敕皆祭祀肅敬之意所  
謂如法也極中也時是也箋云長賜女以中和之福是  
萬是億言多無數所謂如期也  
神之期於子孫者福數正多也

禮儀既備鍾鼓既戒孝孫徂位工祝致告傳致告告利

成也神具醉止皇尸載起鼓鍾送尸神保聿歸傳皇大

也諸宰君婦廢徹不遲諸父兄弟備言燕私傳燕而盡

其私恩疏戒亦備也祭且畢王將出則奏鍾鼓矣周禮

位堂下面面位告者告孝孫也特牲士禮其正祭於旅

酬後祝告利成改饌闔戶牖再告利成士不賓尸也少

牢大夫禮其正祭終獻後告利成尸出又賓尸告利成

尸出改饌再告利成鄭注云利猶養也成畢也孝子之

養禮畢案此告利成之節次也諸侯以上禮更隆盛楚  
茨篇中兩言致告皆是告利成上章工祝致告謂正祭  
祭畢此章工祝致告謂繹祭祭畢毛於此章發傳者至  
繹祭而事尸之禮乃終也改饌尸已出則利成致告於  
主人尸未出則亦致告於主人箋言告尸失之○郊特  
牲云尸神象也周七廟當有七尸旅酬則六尸故云神  
具醉止具俱也皇訓大少牢無君稱皇尸則皇尸為大  
尸尊大之也詩小學云宋書禮志四兩引皆曰鐘鼓送  
尸正義云鳴鐘鼓以送尸是唐初不作鼓鐘開成石經  
誤與案周禮鍾師掌金奏凡樂事以鍾鼓奏九夏鄭注  
云以鍾鼓者先擊鍾次擊鼓以奏九夏杜子春注云尸  
出入奏肆夏是肆夏亦有鍾有鼓矣不得謂但鼓擊其  
鍾也神保率歸箋云神安歸者歸於天也宋書樂志引  
詩作神保通歸通與率通○正義云周禮宰夫無徹饌  
之文膳夫凡王祭祀賓客則徹王之胾俎注膳夫親徹  
胾俎胾俎最尊也其餘則其屬徹之然則徹饌者膳夫  
也言諸宰者以膳夫是宰之屬官序官膳夫上士二人  
中士四人下士八人故言諸也又云周禮九嬪凡祭祀  
贊后薦徹豆籩知君婦豆籩而已餘饌諸宰徹之也長  
發傳不遲言疾也傳云燕而盡其私恩者釋經燕私二

字之義箋祭祀畢歸賓客之俎同姓則畱與之燕所以尊賓客親骨肉也正義云特牲祝命徹胙俎豆籩設于東序下注胙俎主人之俎設于東序下亦將私燕也是祭末而燕私之事歸之俎所以尊賓客畱之燕所以親骨肉也

樂具入奏以綏後祿爾殽既將莫怨具慶傳綏安也安

然後受福祿也將行也既醉既飽小大稽首神嗜飲食

使君壽考孔惠孔時維其盡之子子孫孫勿替引之傳

替廢引長也疏綏安穆木同安謂神安祿謂子孫受福祿此總括上文神饗獲福之意既醉篇

爾肴既將傳亦云將行也兩傳行字皆讀如行列之行伐柯籩豆有踐傳踐行列是義也此承祭畢燕私

而言中庸云親親則諸父昆弟不怨所謂莫怨具慶也既醉者既醉以酒也既飽者既飽以德也既醉傳云既

者盡其禮終其事又云終於饗燕始於享祀文義與此正同此已下復因燕私醉飽而推本於祭祀受嘏與弟



三章末三句一意孔甚惠順時是也盡之盡其禮也甚順者無不順甚是者無不是祭統云唯賢者能盡祭之義賢者之祭也必受其福非世所謂福也福者備也備者百順之名也無所不順者之謂備言內盡於己而外順於道也普廢釋言文說文並部云普廢也召旻傳同引長釋詁文行輩卷阿召旻傳皆云引長也爾雅釋訓云子孫孫引無極也舍人注云子孫長引美道引無極也

### 信南山六章章六句

信南山刺幽王也不能脩成王之業疆理天下以奉禹功故君子思古焉

信彼南山維禹甸之昀昀原隰曾孫田之傳甸治也昀

昀墾辟貌曾孫成王也我疆我理傳疆畫經界也理分

地理也南東其畝傳或南或東疏周禮稍人注甸讀與維禹畝之之畝同賈

疏云出韓詩古句陳聲義相同也傳註句爲治韓奕同  
書禹貢雍州荆岐旣旅終南惇物至於鳥鼠案荆岐渭  
北山終南惇物渭南山終南在今長安縣南惇物在今  
武功縣南皆爲南山禹治水災自東而西終南及惇物  
皆有功施詩言禹所治之南山卽此也均人注句均也  
讀如營營原隰之營釋文營音均又音句玉篇營均也  
均與營同傳云墾辟者夏小正正月農率均田傳  
率者循也均田者始除田也言農夫之急除田也周語  
墾田若藝韋注云發田曰墾辟者開也序言成王故知  
曾孫爲成王也行葦維天之命傳同田讀如句言成王  
之脩奉禹功也○傳云疆畫經界也者說文疆界也或  
作疆月令孟春之月王命布農事命田舍東郊皆脩封  
疆審端徑術鄭注云封疆田首之分職術周禮作遂凡  
井牧其邱甸縣都之田野營造徑畛涂道之通路皆我  
疆事也孟子滕文公篇使畢戰問井地孟子曰夫仁政  
必自經界始經界不正井地不均穀祿不平是故暴君  
汙吏必慢其經界經界旣正分田制祿可坐而定也○  
云理分地理也者考工記匠人凡溝逆地防謂之不行  
鄭注云防謂脈理說文云防地理也周語農祥晨正土  
乃脈發韋注云脈理也凡種桂之種原隰之宜上地中

地○下地田萊之數皆我理事也疆理所以治田二者相  
須而行故此詩及縣通疆通理江漢于疆于理皆連言  
之○云或南或東者或之爲有也或南者有南其畝者  
也或東者有東其畝者也韓子外儲說右上篇晉文公  
伐衛東其畝又呂覽簡選篇晉文公東衛之畝高注云  
使衛耕者皆東畝以遂晉兵也成二年左傳晉卻克伐  
齊使齊之封內盡東其畝賓媚人曰先王疆理天下物  
土之宜而布其利今吾子疆理諸侯而曰盡東其畝而  
已唯吾子戎車是利無顧土宜杜注云晉之伐齊循壑  
東行易蓋南東必因地氣齊衛在晉東故晉使東畝爲  
不顧土宜也程瑤田通藝錄阡陌考云阡陌田閒之道  
也亦作仟佰訓故家釋阡陌者皆言南北曰阡東西曰  
陌惟應劭風俗通具二義曰南北曰阡東西曰陌河東  
以東西爲阡南北爲陌諒哉應氏之說得古人物土宜  
之義矣天下之川皆東流故川橫則澮縱漚又橫溝又  
縱遂又橫遂橫者其畝必縱而畝陳於東是故東畝者  
天下之大勢也遂上有徑當百畝之閒故謂之陌其徑  
東西行故曰東西曰陌也遂上之徑東西而行則溝上之  
畛必南北行畛當千畝之閒故謂之阡而曰南北曰阡  
也然則南北曰阡東西曰陌此阡陌之通義以其義出

於東畝蓋東畝者天下之大勢也然有東畝者亦有南  
畝者天下之川大勢雖皆東流而河東之川獨南流河  
爲川之最大者而或南流則其畝必南陳而爲南畝矣  
南畝畎橫則遂縱徑亦縱而爲南北行豈不南北爲陌  
乎溝橫畎亦橫而爲東西行豈不東西爲阡乎由是涵  
又縱澮又橫而川則縱而南流矣河東之川天下之大  
川也而獨南流故特舉之以爲東西而爲阡南北爲陌之  
例物土之宜以爲阡陌必具二義而不知者乃是此非  
彼蓋亦勿思矣河至大伾又北流則畫畝之法與河東  
川之南流者同爲南畝而晉人乃欲使齊之境內盡東  
其畝此賓媚人所以有無顧土宜之席也阡陌之名從  
遂人而名之義不繫乎畝與夫之千百命名之事惟變  
所適亦自然之勢也奕案詩言畝有南東則阡陌亦必  
南東程說足以證三代定畝之至意天下之川東西流  
者畝必東南北流者畝必南其大較也河東之川南流  
幽岐豐鎬在大河之西其川與河東之川同是南流其  
畝必南陳故七月甫田大田載芟良耜等篇皆云南畝  
此篇言疆理天下故云  
南東畝是立文之義矣

上天同雲雨雪雰雰(傳)雰雰雪貌豐年之冬必有積雪

益之以霡霂既優既渥(傳)小雨曰霡霂既霑既足生我

百穀(疏)藝文類聚天部下引韓詩外傳云凡草木華多

猶紛紛御覽天部入引詩作紛紛說文雨部無雰字疑

古毛詩本作分分後人加兩耳晏子襍上篇云陰水厥

陽冰厚五寸者寒溫節節則刑政平平則上下和則

年穀孰案此與傳豐年積雪之說畧同爾雅釋天小雨

謂之霡霂傳所本也說文霑澤多也引詩作霑玉篇

霑今作優說文渥濡也足即湜之假借字

疆場翼翼黍稷彧彧(傳)場畔也翼翼讓畔也彧彧茂盛

貌曾孫之穡以為酒食畀我尸賓壽考萬年(疏)場訓畔

田界也翼翼恭敬兒故讓畔謂之翼翼彧者齊之隸變

玉篇作𦵏𦵏廣韻作穡穡云黍稷盛兒○伐檀傳斂之

日穡以為酒食以黍稷為酒食也凡祭祀有安尸饗賓

之禮楚茨云我黍與與我稷翼翼我倉既盈我庾維億

以為酒食以享以祀以爰以侑以介景福又云為豆孔  
庶為賓為客獻酬交錯禮義卒度笑語則獲神保是格  
報以介福萬壽攸酢是其義也

中田有廬疆場有瓜是剝是蒞傳剝瓜為蒞也獻之皇

祖曾孫壽考受天之祐疏公劉傳廬寄也說文廬寄也

廬之謂也宣十五年穀梁傳古者三百步為里名曰井  
田井田者九百畝公田居一古者公田為居井寵蔥韭  
盡取焉范注云八家共居是廬在公田中矣漢書食貨  
志理民之道地籍為本故必建步立畝正其經界六尺  
為步步百為畝畝百為夫夫三為屋屋三為井井方一  
里是為九夫八家共之各受私田百畝公田十畝是為  
八百八十畝餘二十畝以為廬舍是班本孟子八家同  
井同養公田定為八家各助耕公田十畝餘二十畝為  
廬舍矣何休注公羊傳云聖人制井田之法而口分之  
一夫一婦受田百畝以養父母妻子五口為一家公田  
十畝即所謂什一而稅也廬舍二畝半凡為田一頃十  
二畝半八家而九頃共為一井故曰井田廬舍在內貴

人也公田次之重公也私田在外賤私也案五口一家  
卽子產治鄭田疇廬井有伍之制亦卽小司徒下地家  
五人之法入家分受公田中畫二十畝爲廬舍則八家  
各得廬舍二畝半此何注因班志以立說韓詩外傳云  
古者八家而井田方里爲一井廣三百步長三百步爲  
一里其田九百畝廣一步長百步爲一畝廣百步長百  
步爲百畝八家爲鄰家得百畝餘夫各得二十五畝家  
爲公田十畝餘二十畝共爲廬舍各得二畝半八家相  
保出入更守疾病相憂患難相救有無相貸飲食相召  
嫁娶相謀漁獵分得仁恩施行是以其民和親而相好  
詩曰中田有廬疆場有瓜此韓傳亦主廬舍二畝半尚  
在班何之前其說當爲近古趙岐孟子耕者九一注云  
八家耕八百畝其百畝者以爲公田及廬井故曰九一  
也方里而井注云公田八十畝其餘二十畝以爲廬井  
宅園圃家二畝半也注與古說同唯梁惠王篇五畝之  
宅樹之以桑注云廬井邑居各二畝半以爲宅冬入保  
城二畝半故曰五畝也趙邠卿本古有在田二畝半之  
說以創此在邑亦二畝半合五畝宅之數不知五畝宅  
在城郭都鄙與田廬本不相涉說見七月篇又案箋中  
田田中也農人作廬焉以便其田事鄭習韓詩而此箋

不言廬畝之數是不從韓詩廬舍二畝半矣甫田箋九夫爲井井稅一夫其田百畝井十爲通通稅十夫其田千畝通十爲成成方十里成稅百夫其田萬畝正義云食貨志取孟子爲說而失其本旨義異於鄭理不可通何則言井九百畝其中爲公田則中央百畝其爲公田不得家取十畝也又言八家皆私百畝則百畝皆屬公矣何得復以二十畝爲廬舍也言同養公田是八家共理公事何得家分十畝自治之也若家取十畝各自治之安得謂之同養也若二十畝爲廬舍則家別二畝半亦入私矣則家別私有百二畝半何得謂八家皆私百畝也鄭於匠人注云野九夫而稅一此箋云井稅一夫其田百畝是鄭意無家別公田十畝及二畝半爲廬舍之事近儒金鶚井田考九一爲助法以九百畝而得一百畝也言公田僅八十畝是輕於九一矣亦與孟子不合鄭謂公田百畝非八十畝也詩所謂中田有廬者乃於田畔爲之以避雨與暑大不容一畝必無二畝半之廣在公田之中也案金說亦從鄭義而與古殊書缺有閒姑備參攷○經言有瓜故知剝爲剝瓜也剝猶削也曲禮爲天子削瓜者副之巾以絺削瓜作蒞所以供祭祀也禮記玉藻論語鄉黨皆有瓜祭皇祖謂先祖也獻



瓜蒞於先祖神饗德  
與信不求備焉也

祭以清酒從以騂牡(傳)周尚赤也享于祖考執其鸞刀

以啓其毛取其血(傳)鸞刀刀有鸞者言割中節也毛

以告純也膏脂膏也血以告殷膏以升臭合之黍稷實

之於蕭合馨香也(疏)周禮酒正辨三酒之物三曰清酒

從獻也量人注云從獻者肉散從酒也御覽禮儀部三

引傳文周尚赤用騂五字與今本異旱鹿篇清酒騂牡

義同享獻也享于祖考猶上章云獻之皇祖耳○說文

鸞鈴象鸞鳥之聲从金鸞省通假作鸞刀有鸞者謂之

鸞刀何注宣十二年公羊傳鸞刀宗廟割切之刀環有

和鋒有鸞是也禮記祭義云鸞刀以封郊特牲云割刀

之用而鸞刀之貴貴其義也聲和而後斷也是言割中

節之事毛以告純也以下二十九字定本集注皆爲毛

傳而正義本以此爲鄭箋誤矣御覽引亦誤今訂正毛

以告純者毛之色全者曰毛猶角之正好者曰角車政

傳宗廟齊豪尚純也豪與毛同膏脂膏者內則燂之以其膏注膏腸閒脂說文膾牛腸脂也引詩作膾或作膏將腸閒肥也一名膾戴角者脂無角者膏此析言也渾言則脂膏不別也血以告殺國語楚語文楚語毛以示物血以告殺援誠拔取以獻具爲齊敬也韋注云物色也拔毛取血獻其備物也禮運云薦其血毛腥其俎禮器云血毛詔於室郊特牲毛血告幽全之物也告幽全之物者貴純之道也鄭注云幽謂血也詩言啓毛取血是卽告幽全之義也言取血又言取膏者膏卽脾膏祭義鬱刀以剗取脾膏乃還又建設朝事燔燎羶薌以蕭先以報氣也注云取牲祭脂也郊特牲詔視于室注云朝事延尸于戶西南面布主席東面取牲脾膏燎于爐炭洗肝于鬱鬯而燔之入以詔神於室又出以墮于主前主人親制其肝所謂制祭也禮器若親制祭注云親制祭謂朝事進血膏時郊特牲取脾膏燔燎升首報陽也升首于堂注云制祭之後升牲首于北墻下尊首尚氣也自此以前謂之朝踐又郊特牲蕭合黍稷臭陽達於牆屋故旣真然後燔蕭合羶薌注云真謂薦孰時也特牲饋食所云祝酌奠於鉶南是也蕭薌蒿也染以脂合黍稷燒之詩云取蕭祭脂羶當爲馨馨之誤也與

或爲薦案此腍膾合黍稷爲饋會也然則朝事饋會皆有腍膾經言取者謂取之以告備傳乃詳及燔燎升臭之義合黍稷實於蕭必終言其事也

是烝是享苾苾芬芬祀事孔明傳烝進也先祖是皇報

以介福萬壽無疆

疏

烝進爾雅釋詁文甫田漸漸之石

馥芬芬香也文選何晏景福殿賦亦云馥馥芬芬馥馥本韓詩楚茨傳云皇大也